

*Minister Michelle Hooyboer-Winklaar:*

## “We are Aruba” ta documenta e caracter multicultural di nos comunidad

**ORANJESTAD** - Recientemente Linda Reijnders a presenta su buki *We are Aruba*, basa riba entrevistanan cu el a skirbi pa e corant *Amigoe* den transcurso di un periodo di dos aña y mey.

E articulonan semanal a keda publica bao di e titulo *Aruba Cocktail*. E autor a splica cu den su entrevistanan el a biha rond mundo, el a duik den e bida y cultura di diferente pais, pero tambe a papia cu e personanan cu el a entrevista tocante di nan emocionnan, pakico nan a bay di nan pais y con nan ta haya Aruba.

Aruba tin henter mundo, Reijnders a bisa, splicando cu e mensahe principal ta cu nos tur ta Aruba y e isla tin un poblacion Arubano bunita cu ta hopi habri



pa otro cultura, e Arubano ta hopi amistoso y kier traha hunto den e comunidad. A

tuma Linda Reijnders un aña y mey pa realisa e buki.

Minister di Enseñansa Michelle Hooyboer-Winklaar, kende tabata presente na e

introduccion di e buki, cu a tuma luga na Arubiana di Biblioteca Nacional, a describi e evento como uno unico mirando tur e diferente culturanan y nacionalidadnan cu a bini hunto pa honra e lansamento di e buki.

“Pa skirbi un buki no ta algo facil y ta rekeri hopi dedicacion. Linda Reijnders a produci algo hopi unico cu ta duna un perspectiva nobo di Aruba. Sra. Reijnders a presenta un reflexion di un Aruba cu ta consisti di habitantenan di 80 nacionalidad cu a wordo atrae pa bin Aruba y despues a keda.

Den su buki e ta duna un bon impresion di hopi cultura bibando banda di otro den harmonia”, Minister Hooyboer-Winklaar a subraya.

“Un pais multicultural manera Aruba no ta solamente atractivo economicamente, pero tambe un bon luga pa biba, cual den e storianan sigur ta keda refleha. Lesando e buki, ta haci nos comprende pakico mester persevera y salvaguardia e caracter multicultural di nos isla”, Minister Hooyboer-Winklaar a conclui bisando. □

